

Ɔɔl saba kaplāŋ Filipefa ye

Syaha fla

¹ Wii mpāy too ma Yesu Crise tēntē-, ndoo Ɔɔl tesē Timuti ne, wii me too saba nwo yrūhū nɔ wāā. Wo u yrūhū nɔ wāā yii Filipefa mpāy bye kē, tee yii le soho Yesu Crise koho wo, yii ma suhu ye Yesu kāndeyārfa yahaseefa ne tesē pe koholefa ne ye yahaseefa ye. ² Wo Tuhufua Yāhā tesē wo Yīŋfua Yesu ne, ke ke kayī wāā ye kē tesē ke yrīŋ ne.

Ɔɔl Yāhā nar Filipe Yesu kāndeyārfa wī na

³ Yalebye, n ma ye wī ga, n ne syaha wāā Yāhā kē ye bye wī na. ⁴ Yalebye, n ma nii n pāā Yāhā ne ye wī na, le ma ne nii ra ye nuhu wī. ⁵ Ye sē yāā, ma gbe per gii na tee le Yesu kapāyī wī sya, ma sya ba waa nanga na, ye sē yi kāā le kur ye ye; ye maha koho le ra ye le wāpāātay wī na tebehe bye wo, koo kē. ⁶ N le cā laha, Yāhā kayī lii wāpyen koho yigi ye laam wo, ke ga le pye ga kua ye bye kē, Yesu Crise n cā pa. ⁷ -Ye yāŋ, ye wī yai le gboho ra laam wo. Ye wī -sē gboho ra laam wo cīinde. Ye sē yāā, Yāhā ke kayī lii wāā ra kē, ye bya taha le na. Ma gbe cāā gii cāā na, tē le Yesu kapāyī tēn koho yigi ye fla na, ma sya ba waa yagaa na, tē ma nwompihi wo. N sē naa n sya le kapāyī wāwlāhā wī na ye, ma naa nawee-

yar, le ma cĩnde, ma naa pe le le wo. ⁸ Yāhā ge cā cĩnde ne tē n pāa ma yee, ye ntāŋ dye gboho ra tāy. Yesu kē u ra ta ke syi.

⁹ Tē Yāhā nar ye kē lii ne, le nde: Kaa ke naa n taha Yāhā ntāŋ wādyen na ye tāy, tesē ye maha cĩnde kai- cā ye ke war naa n yō. ¹⁰ Loo ga waha ye ta, ye n wāyĩ cā wāpee ne, ye naa wāyũhũ pye. U Yāhā Yĩndefua Crise durbaper, ye ga ba nii gbegbe, kapee laa saa pye ye yĩŋ na ye, waa saa ba wāpee laa yāa ye wĩ na ye. ¹¹ Yesu Crise kāmāy na, kai- nkāy ke sron, ye ga naa koo pye Yāhā miingbāŋ n yi, nawee- bye n naa ke gboho.

Yesu Crise woo, u ma cĩnde yrā

¹² Wo nna, yii mpāy tee n yār Yesu kānde wo, n n traha ye le cā ye yee, lii le ra dye nde, loo ge maha nii yĩŋ, nawee- busāa n le Yesu kapāyĩ wĩ cā. ¹³ Ye sē yāa, mpāy pe ke klo yĩŋfua kangbāŋ sēŋ tesē nawee- mpāy bye ne pe ra wĩ luhu, pe bye le cā tāŋ ma cā, n tēn tē u Yāhā Yĩndefua Crise kē. Pe cā u Crise tēn wĩ ne tē ma nwompihi wo. ¹⁴ Yesu kāndeyārfa mpāy pe ra yāa nwompihi wo, loo nde poo busāa ta, pe n nii kaa taha pe koho wātahayaha na Yĩŋfua Yesu na, ma maha nii kaa taha le Yesu kapāyĩ wāpāa na nawee- ye, pe sē n fya ge fya ye. ¹⁵ Poo nanem mpāy -sē ra laanyar yigi, ma nii Crise wĩ pāa kaa ter syi, ma nii ra yē yigi. Mpāy -sē ma, pe Crise wĩ pāa laanyōm ne. ¹⁶ Ta ntāŋ dye poo tāy, koo kē. Pe cā, Yāhā ra taha le Yesu kapāyĩ na ma yee, n ma n naa n sya le wĩ ne ye. ¹⁷ Mpāy pe -sē ra laanyar yigi, pe ma sya Crise wĩ pāa, pe

n ke pe pe ya tyĩn ra ne. Pe maha n ke, pe kaa taha ra wãfãƿ na ke nwompìhi laam wo.

¹⁸ Nkãy poo naweepee- mii pe n pye, le sē ra gbe ye. Le tãy, pe wãpee ga ra wĩĩ na woo, pe wãyĩĩ ga ra wĩĩ na woo, pe Yesu kapãyĩĩ loo pãã n wa, loo nde nuhu le ra laam wo, nanga tesē sukũhũ ne. ¹⁹ Ye sē yãã, n cã ma yee, ye Yãhã wãnar kãmay na tesē Yesu Yrã koho wãleŋ ne ra ye, n ga ba wloho yi koo ngĩĩ bye laam wo. ²⁰ Tē loo cã wa, ma koho taha yaha le na ta laam bya ne, fyar saha ra yigi laa ne ye. Tē ma ge ma na, laanyĩn mpãy pe ma ra laam wo, wãkuayãã wãm sē me pe ne ye. Loo na, n ma yrãŋ woo, n ku woo, n le cã laha, nawee- ga u Crise miingbãŋ cã ra kãmay na. ²¹ Ye sē yãã, n ma kuee yrãŋ na, u Crise woo u ma ra kãnkai- bye. N ma ku, le ga nii ra ye kayĩĩ.

²² N ma -sē yai n kuee yrãŋ na, n tēn laa tē ga yaha ye u Crise myaha na, le bya ma wãyĩĩ. Koo katε- syãŋ ngĩĩ laam wo, tē ga lii yãŋ gbe, n sē le cã ye. ²³ Le ma mii, n ma katε- syãŋ nsoho wo. N ma ga waha ne yi kãã driyē nge wo, n ga nii Yesu tãy, loo le ne ga tãy ra ye. ²⁴ Lii le puar, n kuee driyē laam wo ye wĩĩ na, loo le ma yĩŋ. ²⁵ Loo ne tē ga yigi. N cã n ga kuee yrãŋ na. N cã n ga kuee ye ne, n naa koho le ye ye, ye n naa nuhu yãã Yesu kur ye, ye naa kaa taha u wãtaŋ na ye Yater. ²⁶ Loo na, n ma maha ba dur ga ye fla na, le ga ba nii ye ye yĩnkuãƿir wĩĩ, ye troho wãtãhã na Yesu kãnde wo.

Ye troho wãtãhã yai ke wãã le le Yesu kapãyĩĩ wũhũ ne

²⁷ Lii le ma yīŋ, ye tyii ye troho wātāhā ter n wāā le le Yesu kapāyī wūhū ne. Loo na, n ka maa ye yāŋ woo, n sē yāā ka ye woo, n ga cā, ye yii plāhā kuee le Yesu kānde wo. N ga maha cā, ye byε, ye wāā le yīmbui nen na, ma yer laantee nen na mii naan dyaŋ tee ga miy Yesu wāta Yater wī na. Le kapāyī loo le wo laam wo. ²⁸ Ye ma syi ye fya ye napī- na laa gε ne ye. Ye ma pe yē nder, le ga nii kayar dyaŋ, Yāhā pe yar ma yee, pe n gaha pe ya wī klahasaha wo, ma -sē yii yar ma yee, ye n gaha ye wāsyayaha saha wo. Yāhā wī ne loo ne. ²⁹ Ye sē yāā, Yāhā kayī wāā ye kē ma ye ta, ye n Yesu ta ye Yater; loo ya sē ne ye, ke maha ye ta ye n wāfāy yāā Yesu kur ye. Yāhā wī ne loo ne. ³⁰ Yagaa, ta tēn laam wo, sesrār rii tē naa n srā, ye bya dye ra kue ye too sesrār nen ya ne. Tee naa ra yāā sesrār rii na faale wo, too ne. Ye maha cā ma yee, too sesrār ya ne tē n srā ma sya ba waa yagaa na.

2

-Ye yii tege tāā ye Yesu Crise wāŋ syi dyaŋ!

¹ Tee seefar le u Yāhā Yīndefua Crise ne, ye sē cā la ma yee loo nde ye laam yīn? Ye ntāŋ pe dye u tāy, ye sē cā la ma yee loo nde kaa taha ye fāŋga na? Yāhā Yrā le ma ye laam wo, ye sē cā la ma yee ye ma yīmbui nen na le ne? Ye sē cā la ma yee ye ntāŋ dye yii tāy, ye n nii kayūhū pye yii kē? ² Koo kai- ngī wī na, n ga laa nar ye ye: -Ye yīmbuhu wāā le, ye tyii ye byε ntāŋ n dye yii tāy, ye n naa n nii laantee nen ne, ye naa kate nen ya kar! -Ye naa koo ngī pye, loo na ta laam

ga yīn. ³ Ye ma syi ye naa yii kihi ye nampyeᅇ-
ne ye! Ye ma syi ye yee yii ga laa pye ye myaha
yāã le na ye! -Ye naa yii tege tãã ye ye nampyeᅇ-
yīnde na! -Ye naa ye nampyeᅇ yāᅇ mii u ter ye
yaha! ⁴ Waa ma syi u naa u ya wīi ya kar ye! -Ye
naa ye nampyeᅇ- wāyō wīi bya kar!

⁵ -Ye naa n nii yii ne Yesu Crise laam ter ne.

⁶ Yesu Crise tuu sē bii pa wa kãntraha na ye,
u pye Yāhã tãy,
ma pye Yāhã wāᅇ syi kãnkai- bye wo.

U sē yigi ke niisayūhū wīi na,
ma kuee yai tãᅇ yāhãyīᅇ na ye.

⁷ U koo niisayūhū nge ge yāã,
ma ke ta yaha,
ma ba nii tēntēle syi ya draha wo.

U ba nii nawee wāᅇ syi dyaᅇ,
ma nii nawee- bye ne wācēᅇ.

⁸ U le sya ma u ya tege tãã ye,
ma nii n luhu Yāhã ye
ma sya ga gbã yāã le na, fyar gbã trã na.

⁹ Loo ne, Yāhã n u kuã yir ga ta ncaha ye,
kai- bye yīᅇ na, ma miingbãᅇ wāã u kē,
miingbãᅇ gii ke ter myar bye yaha.

¹⁰ Loo na, yāhãyīᅇfa, kãntrahafa ne,
tesē kãntraha tããfa ne,
pe bye yai pe naa kãnklūy gbãã Yesu yaha
ye.

¹¹ Pe bye ga le cã, pe sya le pãã yi pe yee,
a Yesu Crise woo u ma Yīᅇfua.
Loo na, Yāhã miingbãᅇ ga yi.

Ye yai ye nii naalor wāᅇ syi dyaᅇ wam wo!

¹² Ta naambiyām, cãã gii cãã na tẽ pye ye tãŷ, ye naa n luhu ra ye yalebye. Yagaa tẽ wee ye tãŷ ye, ye yai ye gbihi naa n luhu ra ye! Ye yai ye fya yigi Yãhã na, ye naa n luhu ke ye! -Ye yii waha ye naa ye wãsyayaha wĩ yar gbaa na! ¹³ Ye sã yãã, Yãhã ma ke tẽn tẽ ye nsoho wo yalebya, ma ga ye ta, ke laam wĩ n tãŷ ye ye tesẽ ye n naa loo pye.

¹⁴ -Ye naa koo kai- ngĩ bye pye ye kãnkai- bye wo! Ye ma syi ye naa n sã laa wo ye! Ye ma syi ye naa kaplãŋ tyĩn laa wo ye! ¹⁵ Loo na, kapee laa saa pye ye yĩŋ na ye, ye laam ga nii gbegbe, ye ga nii naweeyõm. Ye ga nii Yãhã pii driyẽfa laam wo, driyẽfa mpãŷ pe sã n sron ye, ma maha pee. Ye yai ye naa n yehẽ palpal pe laam wo, mii yrompii dyaŋ yãhãŷĩŋ na. ¹⁶ -Ye naa n nii pe laam wo koo syi, ye naa le kapãn yar pe na, kapãn lii le cĩnde yrã wãã nawee kã. Ye ma nii n pye koo syi, ye wĩ ga ba ra yĩŋ kuã yir u Yãhã Yĩndefua Crise durbaper. Loo nde ga ba le yar ta tẽn sã yi tẽwai ye, n sã fẽn ka naa n sya ye.

¹⁷ Tee Yesu ta ye Yater, le ma mii diŋ dyaŋ tẽ yi Yãhã kã. Laa na, ta ntãŋ bya ga ba woo, ta n ku dye taha koo diŋ nge na. Le ma pye ke dyaŋ, n ga nuhu di le na, n maha nuhu di ye wĩ na. ¹⁸ Ye bya, -ye naa nuhu di ra wãŋ syi dyaŋ, tee maha naa nuhu di ra wĩ na!

Timuti ye wĩ, Yepaflohodi ne

¹⁹ N koho taha yaha Yĩnfua Yesu na, u ta ta n Timuti lehe wãã ye fla na plii nde na, u n dur ba ye wĩ pãã ra ye, ta laam n yĩn. ²⁰ Woo ya kã u laam ga ra ne wãcẽŋ, ma maha ye wĩ le yaha u

laam wo. ²¹ U nampyen- bye pe ya wĩ ya kar, pe sē Yesu Crise wĩ ga ye. ²² Timuti tuu tēn lii tē ra ne mii dya dyan u tuhufua ne le Yesu kapāyĩ wĩ na, tesē wāfāy gii bye ke u dye, ye koo ngĩ bye yāā yĩnde ne, ma cā u sron. ²³ N ma ba laa cā wa ra wĩ na, n n yān n u nō wāā ye fla na. ²⁴ N koho taha yaha Yīnfua na, u ta ndoo ge n ka n ga ye yān plii nde na.

²⁵ Ma yee wo Yesu kāndeyārwe Yepaflohodi wĩ na, u koho le ra ye Yāhā tēn laam wo, ma suhu ra sesrār ne le tēn wĩ na. Ye cā, woo kē tee lehe wāā ra ye, u n ba ye diŋ nge wāā ra kē, ma yee ye yii wāā ma koho le ra ye ta fen wo. Yagaa le yai, n u dur wāā ye kē. ²⁶ U n traha u ye bye yāā. Tee le luhu ma yee, u sē pye wāwee ye, loo nde u fāy gbobo. ²⁷ U ba yaa cĩinde, ma sya ba kuee wale nen. Yāhā n -sē u fen di, woo ma suhu ra bya ne. Ye sē yāā, ta laam ba wlāhā. Yāhā ma ne yee ke sē wo fen di ye, n ga ne ku fen ne. ²⁸ Ndoos ge n ke n u nō wāā ye kē farfar, ye laam n dur nii nuhu ne. U ma ga yi ye na, le ga nuhu yigi ye kē, ra bye ne. ²⁹ Loo na, -ye u wāā ye sya cĩinde nuhu di u wādur wĩ na ye ye. Ye sē yāā, Yīnfua kāmāy na, u ma ye ne mii tuhufua nen pii dyan. Ye yai ye naa nagbobo taha poosyifa na. ³⁰ Ye sē yāā, u ba yer gbā wāku na u Yāhā Yīndefua Crise tēn kur ye: Diŋ gii tee yi ma yee, yaa koho le ra ye, ye saa ne waha pa ra kē ke ne ye; woo le sya, ma pa ke ne ra kē, ma sya ne ga ba gbā yāā le na.

3

Wo ga waha sron Yesu woo kāmāy na

¹ Wo nna, yagaa tee ye laam wãã le Yĩŋfua ne, -ye naa nuhu di loo nde wĩĩ na! Tě lii yrũhũ yar wa ye na, n ga maha waha loo wĩĩ nen ya yrũhũ yar ye na; loo nde sě wãfãƷ kua ra ye ye, le ga maha laa yõ ye kě. ² Napee- mpãƷ ma pãm wãŋ syi dyaŋ, ma pe ya ta Yesu Crise tẽntẽ-. Poo wãkũũ wĩĩ loo ya ta yĩŋ Yãhã kãnde wo. ³ Koho gii ke nawee kũũ, ke saha nawee sya yaha ye. Yãhã Yrã Fãnga ke -sě tẽn lii tẽ nawee laam wo, loo ne le ga waha u sya yaha. Ye sě yãã, wo Yãhã sey Yãhã Yrã Fãnga kãmay na. Yesu Crise woo, u ma wo ye, wo yĩnkuãƷir wĩĩ. Wo sě koho taha yaha nawee- koho kai- ngĩĩ na ma yee, koo ga waha wo ta, wo n sroŋ Yãhã yĩnde na ye.

⁴ Wii ma yee, nawee koho kai ga waha nawee sya yaha, u cã, ndoo wlaha koo kai- ngĩĩ wo, ma sya ta ter. Nwa ta ndoo sě -sě ra koho taha yaha koo kai- ngĩĩ na ye? ⁵ -Ye yãŋ, tẽ see ra plii kuatãã wuhu, pe n ta kũũ. Yiisrefa naa maha kě ra ne, Běsyame terfua kě ra ne. Yeberefa naa kadye kě ra ne, too yor ne tẽ n pãã. Yiiffee- kãnde na, ye cã Farisyẽ poo kě pe cã loo kãnde yigi klue sĩĩ; n -sě pye poo ne. ⁶ N ba Yiiffee- kãnde nde yigi ter klue sĩĩ, ma sya naa Yesu kãndeyãrfa ke yĩntayãhã ne, ma naa pe boo. Kãnde lii le ta, wii ma yee le wãƷar ga waha nawee ta u n sroŋ Yãhã yĩnde na, le wãƷar fue sě pye ra na ye.

⁷ Faale na, n ba naa koo kai- ngĩĩ bye yãŋ mii kayĩĩ laa dyaŋ ra ye. Yagaa, u Yãhã Yĩndefua Crise wĩĩ ta, n le cã laha ma cã, yĩŋ wee ke na ye. ⁸ Koo kai- ngĩĩ, ma suhu kai- nkãƷ ne nawee- n pye ma yee, Yãhã ga kayĩĩ wãã pe kě, yĩŋ wee koo ngĩĩ bye na ra ye ye. Tě cã Yesu Crise woo

kē ta Yīnfua, loo le ma yīŋ, ma ter koo ngīi bye yaha. U wīi na, n sē n traha n naa koo kai- ngīi luhu ye. N ke yāŋ mii kāntraha kafar rii syi dyaŋ pe pe n kāā. N n ke n u Crise yāā, ⁹ n nii loho ma n waha yi wo nsoho wo u ne ye. N Yesu Crise ta ra Yater; loo ne, le ra ta ra n sroŋ Yāhā yīnde na. Yāhā koo kē, ke ga waha ta nawee wii u Yesu Crise ta u Yater; u sroŋ ke yīnde na. ¹⁰ Lii ya tē n ke, n u Crise cā, n maha u fānga cā, fānga gii ke u ta u n yir gbā wo, ma dur ba yrāŋ na gbaafa ye. N maha n ke, n naa wāfāy yāā u ne, n nii nakugu wāŋ syi dyaŋ kapee- wāpyeŋ kue ye, mii tuu ku mii syi dyaŋ trā na. ¹¹ N koo ngīi ke ma yee, ta bya n ba yir gbā wo, n dur nii yrāŋ na.

-Too naa le wāyīi fla ya kar!

¹² N sē yee n nō wa le wāyīi fla na ye. Koo yīntaha kē, n sē yee n nii wa nawee wii syi Yāhā ke n ke ye. N -sē nii plāhā, ma fā n gaha le wāyīi yāāsaha wo; ye sē yāā, Yesu Crise ra yāā wa. ¹³ Wo nna, n sē yee n le wāyīi yāā wa ye, aye! Lii tē -sē n pye, loo ne nde: Ta kalaa wee ta faale kai- na ye; lii le ma ra yahasee ye, loo ne tē n kar. ¹⁴ N fā n gaha koo syi le wāyīi yāāsaha wo, wāyīi lii Yāhā yee too fā ga le yāā yāhāyīŋ na, Yesu Crise kāmāy na.

¹⁵ -Too laantee nen nde yāā, wii mpāy, wo yīntar too Yesu Crise wīi na. Ye laam wo, mpāy ma -sē pye, pe laam wīi ma le ya ya, Yāhā ga ba le cīinde fla yar pe na gbaa na. ¹⁶ Kānde lii ya wo bye le sya laantee nen ne ma n gaha, ma sya ba waa yagaa na, -too naa n gaha loo ne! ¹⁷ Wo nna, -ye naa n yāŋ ta na! Nawee yai u naa u

troho tãhã mii le Yesu kãnde wo, wii loo pye ma yee, nawee- bye n yãŋ gbe wo na. Mpãy pe pe troho tãhã koo syi, -ye naa poo yãŋ!

¹⁸ Laa ma tẽ n pãã ye ye yalebye. N nwo, tẽ maha le pãã ye ye yagaa yĩntãm ge ne: Nawee-busãã mpãy ma, u Yãhã Yĩndefua Crise tuu ku trã na lii na, pe loo sye, ma sya pe ya ta loo nde napĩ-

. ¹⁹ Pe n gaha pe ya wĩ klahasaha wo. Ye sã yãã, pe sã laa ge wũ Yãhã ku ye mii pe laha wĩ sã ne ye. Lii le yai le nii pe ye fyar wĩ, loo le ma pe ye yĩnkuãyir wĩ. Tesẽ driyẽ wãn ya ne, poo pe n kar. ²⁰ Ma sã yee, wii poo na, wo niisaha ma Yãhã tãy! Wo Syayahafua wii u ma wo Yĩnfua Yesu Crise, wo u wãdur sēŋ, u dur ba farfar. ²¹ Fãnga gii ke ma u ye, u n ga waha nii wãn bye yĩŋ na, u ga ba koo fãnga ta, u wo driyẽ kadye napõrge nge wã klaha ta, ke n nii woo kadyeyũhũ wãŋ syi dyaŋ, woo kadye gii wãklahayãã wee ke na ye.

4

Kayar fla

¹ Wo nna, loo ne, ye yai ye yii plãhã ye troho wãtãhã ne. Ye sã yãã, ye ntãŋ dye ra tãy. Ye wãyãã wĩ gbobo ra laam wo. Ye ra laam yĩn. Ye wĩ ma kayĩ lii tẽ yãã ta tẽn kur ye. Ye wĩ ma yĩnkuãyir wĩ ra ye. Tee yai ye yii plãhã ye troho wãtãhã ne Yesu wĩ ne mii, n ga loo nde yar ye na.

² Yewudihi ma suhu Sentihi ne, yii ca syãm mii, n ga ye nar waha nde ne: Ye yai ye yĩmbuhu wãã le, ye nii yĩmbui nen na. Ye wee la mii cĩfua dyaŋ lefua ne Yĩnfua kãmay na? ³ Mboo wii taa

-sē ma ra tēntēwaibua, n ma nar ma koho le pe ye. Ma sē yāā, pe pye ra ne te sesrār na le Yesu kapāyī wāpāā wīī na nawee- ye, poo ma suhu Klemaa ne tesē mpāy byε ne pe pye ra ne le tēn laam wo. Pe myar yrūhū wa u cīinde yrā yāāfa saba laam wo.

⁴ Tee ye laam wāā le Yīnfua ne, -ye naa nuhu di loo nde wīī na! Ye sē luhu la? -Ye naa nuhu di loo nde wīī na! ⁵ -Ye naa n tāy nawee- byε ne! Yīnfua ga dur ba yagaa. ⁶ Ye ma syi ye naa ntāŋ cεr laa ne ye! Le ma nii laa dyaŋ, ngii wīī ma pye ye na, -ye le pāā Yāhā ye, ye ke nar le ne! Ya'a lii nar Yāhā ye, -ye ke syaha taha le na! ⁷ Ye ma nii n pye ke syi, yrīŋ mpāy Yāhā ga wāā ye kē, pe ga Yesu Crise wīī ta le n nii gbāā ye laam wo, ye n nii ye saa naa laam yigi laa gε ne ye. ⁸ Wo nna, lii le kuee, ta n ye yar le ne: Kai- nkāy ke yō, ma maha yai pe naa ke sey, -ye ye laam byε yaha koo na; koo kē, cīinde wūhū ne, tesē kai- nkāy ne nawee- nagboho ta ke na, tesē kai- nkāy ne ke sroŋ, ma maha laha, ma yō nawee- ye, ma ma yīnkuāyir wūhū. ⁹ Tē ye klaha ma ye yar kai- nkāy ne, -ye naa n pye koo syi! Tee kai- nkāy luhu ra yē na, ma suhu kai- nkāy ne tee ra yāā pyesaha wo, -ye naa n pye koo syi! Loo na, Yāhā -sē ga pye ye ne, Yāhā gii ke yrīŋ wāā nawee- kē.

Pōl syaha wāā Filipefa kē pe diŋ wīī na u kē

¹⁰ N nuhu busāā yāā Yīnfua kāmāy na, tee waha le yar ra na yagaa ma yee, ta wīī gboho ye laam wo. N ba cā ye sē ba ra wīī faha ye, pyesaha koo ke sē ba yāā ye na ye. ¹¹ Le sē nii mii fεn ma ra na, koo ra n pāā ke syi ye. -Ye yāŋ,

tē ma fēn tii syi wo yagaa, n te yē nder wa, laa gē saha sye ra ye ye. ¹² N ga waha nii yigi fēn laam wo, n ga maha waha nii yigi nangbān laam wo. Teebēhē byē wo, n nii wāyigi cā, fāā wo tesē wādiyai ne. Kla ma ra ye busāā woo, kla ma ra ye car ya woo, n kacān yāā ma nii wāyigi cā. ¹³ N ga waha yia koo ngīī byē na Yesu Crise kāmāy na, woo wii u kaa taha ra fānga na. ¹⁴ Tee -sē ra fēn di, ye le pye yō.

¹⁵ Cāā gii cāā na pe ba fe yir le Yesu kapāyīī wāpāā ne nawee- ye, ta n yir Maseduan kāntraha na, ma n tay kui wo, yii gē le cā laha ma yee, ye Yesu kāndeyārfa yawāhāfa ya me pe koho le ra ye. Tē naa le kapāyīī pāā nawee- ye, yii ya me tee le wāyīī dur ra kē, ma koho le ra ye. ¹⁶ Tē pye Tesaloni wo, ngii wīī ke pye ra na, ye koho le ra ye, ma ke kla nō wāā ra kē. Ye loo pye ke tēr tēhē nen yaha. ¹⁷ Le sē nii mii n n kē ye naa koho le ndoo ya ye wālenj ya ye. Lii loo tē n kē, ye Yesu wāta ye Yater wīī n waha ye ta, ye n naa kayīī pye. Loo na, ye n waha kayīī yāā Yāhā ye busāā. ¹⁸ Āwā, tee ngii nō wāā ra kē, n ke byē yāā. Ke yai ra ye ma sya ta tēr. Yagaa, Yepaflohodi tuu pa wa ye kohole kla ne ra kē, ngaa wīī sē maha wee ra na ye. Ye kohole kla wīī n tāy Yāhā ye, ke ma mii diŋ kla gii syi dyaŋ ke dugu n tāy Yāhā ye, ke n ke sya. ¹⁹ Wān tii wīī te ma ye na, wangbāy le ma Yāhā ye mii syi dyaŋ, ke ga ba te byē wāā ye kē koo syi, Yesu Crise kāmāy na mii ke le pye ra kē mii syi dyaŋ. Loo wangbāy nde, kacān wee le nayōr na ye. ²⁰ Wo Tuhufua Yāhā miingbāŋ yai ke naa

n gboho yalebyε, wāyεryāã ma n pye le na ye. Amen, le nii ke syi.

Kuasaha fla, syaha ne

²¹ Nawee- mpāy pe ma Yāhā wām, -ye pe byε syar Yesu Crise myaha na! Yesu kāndeyārfa mpāy pe ma wo ne nwo, pe ye syar. ²² Nawee- mpāy byε pe ma Yāhā wām, ma ma nwo, tesē mpāy gε ne pe ma u fāngafa byε yīnfua kangbāŋ wo, pe byε ye syar. ²³ Yāhā, ke Yesu Crise laantār wī pye ye byε kē!

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

15120496-00e2-503a-8d40-2d7cfdc1ba5b